

Un Isla Kristian?

Tantu hende ta papia di nan mes komo kristian, ta tildia otro hende di no ta kristian, òf ta ta yama nos isla “kristian”. Nos ta bisa nos ta un isla kristian pasobra mayoria hende di nos isla a batisá den un religion ku tin Hesu-Kristo komo su líder. Ma pa mayoria hende, **asina leu so nan kristianimso ta yega!**

Maske pa nos “kristian” ta un palabra popular, e ta usá tres biaha so den Beibel. Ta parse ku originalmente siguidónan di Hesus a yama nan mes “dsipelnan”, “rumannan”, “esnan ku ta kere”, siguidónan di e “Kaminda”, èts. “Kristian” tabata usá pa promé biaha den era di apòstel Pablo (15-20 aña despues di morto di Hesus). Echunan 11:26 ta bisa, *“I na Antiokia e disipelnan a wòrdu yamá Cristian pa promé biaha.”*

No ta konosí sigur bou di ki sirkunstansia e palabra a originá. Ta parse ku e hendenan pagano di e siudat di Antiokia a inventá e nòmber...pusíbelmente pa chercha esnan ku a sigui e siñansa di Kristo. Siguidónan di Hesus mes no a usa e palabra asina tantu te algun aña despues. Ma e nòmber lo a pega pasobra e tabata un bon deskripshon pa un sierto grupo di hende.

Ma “kristian” no ta solamente un palabra pa distinguí un religion for di esun muslim, budista òf Hindu. “Kristian” ta muchu mas ku esei: **un siguidó di Hesu-Kristo...** òf segun Marko 9:41, un hende ku ta **“pertenesé na Kristo”**. Ken anto ta un bèrdadero kristian... un siguidó di Kristo?

1) Un bèrdadero kristian ta un persona ku ta konfia Hesu-Kristo SO pa salbashon. Si nunca bo a atmití na Dios ku bo ta un pekadó ku ta meresé kastigu na fièrnu pa tur eternidat, si nunca bo a realisá ku Hesu-Kristo a tuma BO kastigu riba krus, si nunca bo a bira lomba pa piká i ta konfia Kristo SO pa skapábo di fièrnu, bo no tin entrada serka Dios, maske kuantu bo ta yama bo mes “kristian”. Un bèrdadero kristian ta un hende ku a stòp di konfia tur otro kos pa dun’é entrada serka Dios i ta konfia Hesu-Kristo SO.

2) Un bèrdadero kristian ta un persona ku ta ahustá su bida na e siñansa di Hesu-Kristo. Na momentu ku bo ta konfia Kristo pa salbábo di fièrnu, **bo ta bira un siguidó di Kristo...bo bida ta pertenesé na Kristo. Bo ta obedesé Beibel, si bo ta gusta òf laga di gusta. Bo ta ahustá bo bida na loke Skritura ta bisa.**

Pa ser franko, hopi hende ku ke sa ku nan ta “kristian” ta malamente kiboká! Si bo ta konfia Hesus di bèrdat pa salbashon, bo bida sigur lo demonstrá esei!

Hesus a duna un advertensia serio: *“No ta tur hende ku bisaMi: ‘Señor, Señor,’ lo drenta e reino di shelu; ma esun ku hasi e boluntat di Mi Tata ku ta den shelu. Hopi lo bisaMi den e dia ei: ‘Señor, Señor, nos no a profetisá den bo nòmber, i den Bo nòmber a saka demoño, i den Bo nòmber a hasi milager?’ E ora ei lo Mi deklará na nan: ‘Nunka Mi no a konosé boso; bai for di Mi, boso ku ta hasi inikidat.’”* (Mateo 7:21-23)

E teksto aki ta komuniká bon kla: no ta esnan ku ta yama nan mes “kristian”, no ta esnan ku ta yama Hesus “Señor” òf Rei di nan bida, ni asta ta esnan ku ta hasi milager den nòmber di Hesus ku ta haña entrada serka Dios!

Kuidou pa bo no keda sorprendé dia ku bo para dilanti Dios. Bo por pensa ku Dios sigur lo permitíbo drenta shelu pasobra bo a batisá òf pasobra bo ta e persona mas religioso, mas deboto, mas sinsero den bo religion...i tòg—pa bo sorpresa—E ta bisábo, *“Nunka Mi no a konosé boso; bai for di Mi”!*

Un isla “kristian”? Sigur ku nò! Tanten ku nos no konfia Hesu-Kristo SO pa salbashon, tanten ku nos no ta ahustá nos bida na e siñansa di Hesu-Kristo, nos ta gaña nos mes yamando nos mes “kristian”. Ta keda na abo kiko bo lo hasi. Pasobra ta solamente ora e hendenan di nos isla ta bèrdadero “kristian” e ora ei so nos por yama nos mes un “isla kristian”.